

اوننگ گوجری نیوز بولٹن 29 جنوری 2025

یوہ آکاشوانی جموں ہے عبیدلرحمان تے نصرت چودھری تیں خبر سُنو۔

HEADLINES

۱. لیفٹیننٹ گورنر منوج سنہا نے جموں کشمیر یو ٹی غے اندر قانون ساز ادارہ نانہ مارچ غا پہلا ہفتہ مانہ بجٹ اجلاس منعقد کران غی منظوری دے دتی ہے۔

۲. جنگلات تے ماحولیات غا وزیر جاوید احمد رانا نے ہماچل پردیش غا وزیر اعلیٰ نال ملاقات ور تبادلہ خیال کیو ہے۔

۳. جموں خطہ غے اندر دہشت گردی نال نپڑن خاطر برا پیمانہ ور تلاشی کاروائی شروع کی گئی ہیں۔

۴. نائب وزیر اعلیٰ سریندر چودھری نے ضلع راجوری غا علاقہ مانہ عوامی دربار لاغے مقامی لوکاں غی مشکلات سُنی۔

۵. محکمہ موسمیات نے اج تیں جموں کشمیر غا بکھ بکھ علاقہ مانہ تازہ برف باری تے بارشاں غی پیش گوئی کی ہے۔

LG BUDGET

جموں کشمیر قانون ساز ادارہ غی کاروباری مشاورتی کمیٹی فروری غا پہلا ہفتہ مانہ اجلاس خاطر کاروباری

کیلنڈر نانہ حتمی شکل دین غو ادارو رکھے۔ اجلاس ۳ مارچ تیں شروع وے گو لیفٹیننٹ گورنر منوج سنہا نے پہلاں ہی مرکزی خطہ غا قانون ساز ادارہ غا پہلا بجٹ اجلاس غا انعقاد غی منظوری دے دتی ہے جس دوران ۶ سال بعد پہلی واری جموں کشمیر غو سالانہ مالیاتی منصوبہ پیش کیو جے غو۔ یو ٹی کابینہ نے ۰۲ جنوری نانہ ہوا اپنا اجلاس مانہ مارچ غا پہلا ہفتہ مانہ سالانہ مالیاتی بجٹ منصوبہ نانہ منعقد کرن غی تجویز پیش کی تھی۔ یہ تجویز لیفٹیننٹ گورنر نانہ پھیجی گئی تھیں جنہاں نے اجلاس غی شروعات واسطے ۳ مارچ غی تاریخ مقررہ کی اس اجلاس غی شروعات ایل جی موصوف غا خطاب نال وے غی۔ وزیر اعلیٰ عمر عبداللہ جہڑا جے خزانہ وزراء غو عہدو وی سنبھالیاوا ہیں وے سالانہ مالیاتی منصوبہ نانہ پیش کریں غایوہ بجٹ اجلاس تقریباً ۳ ہفتہ توڑی جاری رہن غی توقع ہے۔ یوہ اجلاس اپنی نوعیت غو دوجو اجلاس وے گو کیونجے پہلو اجلاس ۴ تیں ۸ نومبر توڑی سرینگر مانہ منعقد ہوو تھو۔ جہڑو وزیر اعلیٰ عمر عبداللہ غی حکومت غی حلف برداری تیں گجھ دن بعد منعقد ہوو تھو۔

RANA SUKHU MEET

جل شکتی جنگلات تے ماحولیات غا وزیر جاوید احمد رانا نے اج نوی دلی مانہ ہماچل پردیش غا وزیر اعلیٰ سکھندر سنگھ سوکھو غے نال ملاقات کی۔ ملاقات مانہ انہاں نے مشترکہ مفادات غا امور ور تبادلہ خیال کیو میٹنگ غے دوران جاوید احمد رانا نے قدرتی آبی وسائل غا تحفظ واسطے ہماچل پردیش غی حکمت عملیاں گے نال نال مٹی غا کٹاو تے زمین کھسکن غا واقعات نانہ کھٹ کرن واسطے استعمال کیا جان آلا طریقہ کار بارا مانہ وی تفصیلات لی۔ کیونجے جموں کشمیر تے ہماچل پردیش گے مسائل تقریباً ایک جیسا ہیں۔ جغرافیائی اعتبار نال علاقہ غی مماثلت آئندہ حکمت عملی وے موثر ثابت ہوسکے اس دوران لیڈراں نے قدرتی وسائل غا تحفظ خاطر پائیدار طریقہ کار ور وی تفصیلی گل بات کی ہے۔

SEARCH OPERATIONS

جموں کشمیر مانہ سلامتی دستاں جن مانہ پولیس فوج تے نیم فوجی دستاں شامل ہیں نے دہشت گردی مخالف کاروائی تیز کردتی ہے۔ یہ کاروائی جموں خطہ غا تقریباً ۲ درجن مقامات ور جاری ہیں، خاص طور ور آجا علاقہ تے جنگلاتی مقامات ور قبضہ لکیر غے نیڑے یہ کاروائی تیز کردتی گئی ہیں۔ یہ کاروائی دہشت گرداں غا نیٹویک غے خلاف کی جارہی ہیں۔ جہڑا ۲۰۲۲ مانہ ہوا ہلاکت خیز حملہ غا ذمہ دار ہیں وضع رہ جے گزشتہ سال ہوا دہشت گرد حملہ مانہ ۴۴ افراد غی جان گئی ہے۔ جن مانہ ۸۱ سلامتی اہلکار تے ۴۱ عام شہری شامل

تہا فلحال ۳۲ مقامات ور تلاشی مہیم جاری ہے جس مانہ چناب وادی ور خاص توجہ دتی جارہی ہے۔ اس مہیم گو مقصد دہشت گردان غی پناہ گاہاں نانہ ختم کرنو ہے تے جنگلاتی علاقان مانہ حفاظت نانہ مضبوط تے بہتر بنانو ہے۔ اس کوشش مانہ جدید تکنیکی نگرانی تے خوفیہ معلومات تیں حاصل ہونی مدد شامل ہے۔ اس سلسلہ مانہ پیش ہے مارا نمائندہ اجیدیپ سنگھ غی یاہ رپوٹ۔

اسے طرح جموں کشمیر پولیس نے وی سی۔آرپی۔ایف غی مدد نال ضلع راجوری غا بکھ بکھ علاقان مانہ تلاشی کاروائی شروع کردتی ہے۔ اور قبضہ لکیر غے نیڑے دہشت گردی نال منصوب جائیداراں ور نظر رکھی جارہی ہے۔ ان کاروائیاں غو مقصد مقامی مشکوک افراد غا دہشت گردان کسے وی قسم غا رابطاں نانہ ختم کرنو ہے تے ضمن مانہ مزید تفصیلات غی اجیں اڈیک ہے۔

DODA NASHA MUKT

ڈوڈھ غا چیف میڈیکل آفیسر ڈاکٹر اوم کمار غی سدارت مانہ ڈی ایچ ایس ڈوڈھ تے ایس ڈی ایچ بدرواہ غا طبی عملہ نے پی جی کالج بدرواہ گا میدان مانہ ایک روزہ کرکٹ نمائشی کھیڈ گے دوران نشہ مکت بھارت ابھیان غو عہد لیو۔ اس تقریب غو مقصد منشیات تیں پاک معاشرہ غی اہمیت غا بارا مانہ بیداری پیدا کرنو تھو شرکاء نے برابری واسطے صحت مند تے منشیات تیں پاک مستقبل نانہ فروغ دیتا واں منشیات غا استعمال غے خلاف مہیم غو عہد لیو۔ یوہ اقدام پورا خطہ مانہ منشیات غی عادت نال نمڑن واسطے جاری کوششاں غو حصو تھو۔ اس موقع ور بولتا واں سی۔ایم۔او ڈوڈھ ڈاکٹر اوم کمار نے اس طرح کہیو۔

DY CM PUBLIC DARBAR

نائیب وزیر اعلیٰ سریندر چوہدری نے ضلع راجوری گا پنا کھیتر تے کانگری علاقہ مانہ عوامی دربار لایو ات غا مقامی لوکاں کی مشکلات سنی اس دوران مقامی لوکاں نے تحصیل دفتر غا قیام تیں علاوہ سٹری سب سیٹھر غی تعمیر بجلی سپلائی گا معاملات سڑکاں غی تعمیر تے طبی سہولیات متعلق اپنی مانگ رکھی اس دوران نائیب وزیر اعلیٰ نے ضلع انتظامیہ مانہ ہدایت جاری کی کہ وے ان مزکورہ علاقان گا رہائشاں کی مانگ نانہ ترجیح بنیاداں ور پورو کریں۔ اس تیں علاوہ موصوف نے کھاد غی فروخت کرن آلا افراد نانہ وی خریدار کیو ہے کہ وے کساناں نانہ کھاد غی فراہمی مانہ کوئے مشکل درپیش نہ آن دیں۔ ضلع انتظامیہ مانہ وی ہدایت کی گئی ہے کہ دور دراز سرحدی علاقان کے اندر فلاحی اسکیمیاں غی جانکاری عوام تک پہچان خاطر بیداری پروگرام منعقد کرایا جئیں۔

BADHAAL GRATITUDE

ضلع راجوری غا بدھال گراں مانہ مشکل حالات غے چلتیں گراں گا رہائشیاں نے تمام محکمہ جات غا تعاون تے دیگر امداد ور دلی شکر گزاری غو اظہار کیو ہے۔ اس وقت مزکورہ گراں غا تمام رہائشیاں نانہ راجوری مانہ لڑکاں گا ہائیر سکینڈری اسکول مانہ رکھیو گیو ہے اس ضمن مانہ مقامی اداراں تیں علاوہ ڈپٹی کمشنر راجوری تے دیگر ایجنسیاں گا تعاون نال ان متاثرہ افراد غا رہن سہن تے کھان پین تیں علاوہ تعلیم تے طبی سہولیات وی دستیاب کرائی گئی ہیں ضلع غا بکھ بکھ اداراں غا سانجا تال میل نال ان متاثرہ گنباں نانہ اس مشکل کھڑی مانہ زندگی بسر کرن غو سامان مہیا کرایو جارہیو ہے۔ ہمارا نمائندہ نال گل بات کرتا مانہ بدھال گا ایک مقامی رہائشی نے شکریہ گو اظہار کجھ اس طرح کیو۔

38TH NATIONAL GAMES

ریاست اُترکھنڈ مانہ گزشتہ روز ۸۳ ووں قومی کھیڈ مقابلان کی شروعات ہوئی۔ اس دوران ملک بھر تیں آیا کھلاڑیاں نے کوشی گو اظہار کیو تے اپنا اپنا زمرہ غی کھیڈاں مانہ بہترین کارکردگی غو مظاہرو کیو۔ اس کھیڈ مقابلہ مانہ مارشل، آرٹ تیں علاوہ وشو رائفل نشانہ بازی، چڑی چھکو، کھو کھو تے پانی مانہ کھیڈی جان آلی کھیڈ شامل ہیں۔ واضع رہے کہ اس قومی کھیڈ مقابلہ مانہ جموں کشمیر غا ۱ سو ۸ کھلاڑی ۴۱ کھید زمران مانہ حصو لہ رہیا ہیں۔ یہ کھیڈ مقابلہ کھلاڑیاں نانہ بہترین کارکردگی غو مظاہرو کرن غو موقعو فراہم کر رہیا ہیں۔

WINTER FEST DODA

سیاحت تے مقامی ثقافت نانہہ فروغ دین خاطر ۲ فروری نانہہ ضلع ٹوڈھ گا مشہور سیاحتی مقام لعل درمن مانہہ سرمائی میلہ گو انعقاد کیو جے غو۔ تیجس ایک پہل فاؤنڈیشن غی طرفوں ضلع انتظامیہ تے محکمہ سیاحت گا اشتراک نال منعقد کی جان آلی اس تقریب غو مقصد مقامی معشیت نانہہ فروغ دینو تے مقامی فنکاراں واسطے ایک پلیٹ فارم مہیا کرنو ہے چنیر مین آکاش پریہار نے اس گل ور زور دتو کہ اس میلہ مانہہ کھیٹ تیں علاوہ بیداری تے ثقافتی سرگرمی وی شامل ہیں جس نال روز گار غا مواقع پیدا ویں غاتے مقامی دستکاراں نانہہ اپنو ہنر پیش کرن غو موقعو ملے گو۔ اس تیں علاوہ لعل درمن نانہہ سیاحت گا نقشہ ور آنن واسطے کئی موثر اقدام کیا جارہا ہیں۔ اس موقع ور بولنا واں فاؤنڈیشن گا چنیرمین آکاش پریہار نے اس طرح کہیو۔

WEATHER

جموں کشمیر مانہہ محکمہ موسمیات غی پیشن گوئی غے مطابق اج تیں کئی مقامات ور تازہ برف باری تے بارش ہون گا امکان ہیں۔ محکمہ موسمیات نے اج رات تے کل سویرے کئی مقامات ور بارش تے برف باری ہون غی پیشن گوئی کی ہے۔ اس تیں علاوہ ۱ تے ۲ فروری نانہہ وی برف تے بارش ہون غو امکان ہیں۔ اس دوران جموں سرینگر قومی شاہراہ ور گڈیاں غی آجائی غو سلسلو جاری ہے تے مسافراں نانہہ تیارزی سفر کرن غی تلقین کی گئی ہے۔ اس تیں علاوہ جموں خطہ نانہہ کشمیر نال جوڑن آلی مغل سڑک آلیں تک گڈیاں غی آجائی وستے بند ہی رکھی گئی ہے۔
